

TANG GAMHANAN NGA KRISTO MIABOT SA KATAWHAN SA DIOS NGA NAGDALA UG KAGAWASAN ([The Authoritative Christ Comes to God's People with Freedom](#))

Reading: Revelation 20

Text: Mark 1:21-28

Author: [Dr. Wes Bredenhof](#);

Translated by Pastor Jeff Uriarte

Hinigugma nga kongregasyon sa Ginoong Hesus,

Kung magbasa ug magtuon kita sa Biblia, adunay mga peligro nga kauban niini. Usa niana mao ang posibilidad nga sa atong pagbasa, malak-angan nato ang importante nga mga detalye ug ang resulta mao nga masayop ang atong pagsabot sa Pulong sa Dios o kaha dili nato masalod ang mga bahandi niini. Pananglitan, sa atong teksto karon atong nabasa ang mahitungod kang Kristo nga niadto sa sinagoga aron sa pagtudlo sa Adlawng Igpapahulay. Sa atong pagbasa niini, maghunahuna kita nga mura ra kini nga miadto kita sa *mall* o kaha sa tindahan – sa ato pa, dili talagsaon. Mao nga malabyan ra nato pagbasa. Unsa may naa kung si Hesus miadto sa sinagoga?

Kung ingon niana ang atong panghunahuna, wala nato masabti ang dakong panghitabo dinhi. Unsa man diay ang sinagoga? Ang mga Romano walay sinagoga, bisan amg mga Griyego o Ehiptohanon o bisan kinsa. Ang mga Judio lamang ang may sinagoga. Ang mga sinagoga makit-an sa daghang mga lungsod ug balangay sa mga Judio. Makit-an usab kini sa mga dapit gawas sa Palestina nga daghan nanimuyo nga mga Judio. Ang sinagoga usa ka gambalay kung diin ang mga Judio magtigom alang sa pagsimba. Kung nanimuyo sila sa Jerusalem, mahimong moadto sila sa templo, apan tungod kay dili man tanan nanimuyo didto, ang mga sinagoga gitukod. Sa pagsimba sa sinagoga, adunay mga halad pag-ampo, pag-awit sa mga salmo, ug pagbasa ug pagtudlo sa Kasalutan. Ang mga sinagoga sa mga Judio gitukod alang sa pagsimba ug pagtudlo sa katawhan sa Dios.

Sa pag-adto ni Ginoong Hesus sa sinagoga sa Capernaum usa ka mahinungdanon kaayo nga butang. Sigurado kita nga nakasulod na siya sa mga sinagoga kaniadto kay 30-anyos naman siya. Apan karon wala siya misulod nga maglingkod lamang sa lingkuranan. Misulod siya sa sinagoga nga sa iyang katungdanan nga Mesiyas. Ang Mesiyas nga gisaad sa Daang Tugon miabot sa katawhan sa kasabutan sa Dios samtang sila nagtigom sa pagsimba. Dili lamang kini nga si Hesus nga nagkigduyog sa iyang isigka-tagilungsod, isigka-Galileanhon – kini nga teksto mahitungod sa gisaad nga Kristo nga miabot sa katawhan sa Dios – ang katawhan nga diin ang Dios nagapamuhat sa nilabay nga gatusan ka mga tuig.

Kinahanglan kita ug pagsabot sa kasaysayan aron atong masabtan kung unsay gakahitabo dinhi niining teksto. Atong dumdumon nga ang Dios nagsaad sa Genesis 3:15 nga ang kaliwat sa babaye magdugmok sa ulo sa bitin. Dumdumon nato nga kini kabahin sa katumanan sa maong saad – ang saad nga maghatod sa kagawasan. Ato usab bantayan ang tyempo sa nahitabo dinhi:

usa kadto ka Adlaw sa Pagpahulay (Sabbath). Adunay mga serbisyo sa sinagoga matag-adlaw apan gipili ni Hesus nga maghimo niini sa Adlawng Igpapahulay. Kung lantawon nato sa Daang Tugon, ang Adlawng Igpapahulay mao ang adlaw sa pagsaulog sa kagawasan gikan sa pagkaulipon a Ehipto. Hinumdumi unsay gisulti ni Moises sa Deuteronomio 5 samtang iyang gipahinumduman ang katawhan sa Napulo ka Sugo. Pag-abot niya sa ikaupat nga sugo, miingon siya, “Hinumdumi ninyo nga mga ulipon kamo didto sa Ehipto ug gipagawas kamo sa Ginoo nga inyong Dios pinaagi sa iyang dakong gahom. Busa gisugo kamo sa Ginoo nga inyong Dios sa pagtamod sa Adlawng Igpapahulay.” Kini nga adlaw usab mahitungod sa kagawasan! Dimudo ang kagawasan mao ang hangin nga gininhawa niining nga bahin sa Kasulatan.

Sa atong teksto, ang Ginoong Hesus miabot nga may gahom ug nagdala ug kagawasan didto sa sinagoga. Makaingon kita nga kini nga sulat mahitungod sa adlaw nga ang Dios mismo miadto sa sinagoga sa Capernaum. Mao nga akong gisuma kini nga teksto uban sa tema nga: Ang gamhanan nga Kristo miabot sa katawhan sa Dios nga nagdala ug kagawasan. Atong lantawon ang kagawasan sa iyang pagtudlo ug ang kagawasan sa iyang pagguwa sa usa ka dautang espiritu.

Ang bersikulo 21 nagsulti kanato nga si Hesus ug ang iyang upat ka mga disipulo (Simon, Andres, Santiago, ug Juan) miadto sa Capernaum. Didto na sila sa mga baybayon sa Dagat sa Galilea ug karon miabot na sila sa lungsod sa Capernaum – nga nahimutang usab sa daplin sa dagat. Sa ato ng nakita, nahitabo kini sa Adlawng Igpapahulay, usa ka detalye nga dili nato hikalimtan. Si Marcos nagsulti kanato nga si Kristo misulod sa sinagoga ug nagsugod sa magtudlo. Wala kaayo daghan nga mga detalye nga gisulat si Marcos ug ato kining tagdon. Wala si Marcos nagsulti kung unsay gitudlo ni Hesus. Ang tuyo dinhi dili mao ang sulod sa iyang gitudlo. Kung mapakisayron kita, makapanaghap kita nga tingali ang iyang gitudlo sama ra sa atong nadunggan niadtong laing semana mahitungod sa gingharian sa Dios. Pero panagnga sa lamang kana. Ang atong tagaan ug pagtagad mao buot ni Marcos nga atong tagdon ug mao kana ang gahom sa pagtudlo ni Hesus.

Ang mga tawo nahibulong. Ang iyang pagtudlo dili sama sa nadunggan nila sa uban. Ngano man? Tungod kay siya nagtudlo kanila nga may gahom. Wala siya nagtudlo kanila sama sa mga Judio nga mga escriba ug magtutudlo. Lahi ang ilang pamaagi sa pagtudlo. Kung magtudlo sila, kanunay kauban ang pagdangup sa gahom sa laing tawo, sama pananglitan sa pag-ingon, “Si Moises nag-ingon...” o “Si Rabbi mao-kini nag-ingon...” – apan dili sila magtudlo ug moingon, “Apan ako nag-ingon...” Anaa kanunay ang pagdangup sa mas labaw nga awtoridad o gahom.

Apan lahi si Kristo. Nagtudlo siya nga adunay katungod sa pagsulti sumala sa iyang awtoridad. Nagtudlo siya nga sigurado nga tinbuod ang iyang gipanulti. Wala siya naghatag ug iyang opinyon lamang o opinyon sa uban – siya nakita nga usa ka eksperto. Nakita nga daw nakigsulti ang Dios pinaagi kaniya. Ang mga propeta sa Daang Tugon namulong usab nga sama niani kaniadto. Apan sa panahon ni Hesus, ang propesiya nahunong – gawas kang Juan. Kung ang mga eskriba ug magtutudlo maoy magtudlo, dili sila makapamulong nga adunay direkta nga awtoridad. Apan makahimo niini si Kristo ug mao gayod ang iyang gibuhat.

Kung siya mamulong sa ingon niani nga paagi, kini nagpakita sa kamatuoran nga siya gayod sinugo sa Dios sa pagtudlo ug pagwali. Ang Dios naggahom kaniya sa pagsaka sa pulpito sa

sinagoga ug pagpamulong nga adunay kasigurohan. Sa bersikulo 14, giingnan kita nga siya nasangyaw ug maayong balita sa Dios. Dinhi usab ato siyang makita nga namulong isip magsasangyaw – naghimo siya niini nga adunay gahom ug sa paagi nga nakapatingala sa mga tawo, mga tawo nga wala pa sukad makadungog ug ingon niani nga matang sa pagwali ug pagtudlo.

Aniay tawo nga adunay kagawasan sa pagtudlo nga may kasigurohan ug kaisog. Wala siya nagadepende sa interpretasyon ug opinyon sa tawo. Gawasnon siya nga nagtudlo sa Pulong sa Dios sa paagi nga ang Dios usab maoy magtudlo.

Bisan kung wala kita gisultihan kung unsay iyang gitudlo. Apan makasiguro gayod kita nga dili kadto lahi sa maayong balita nga iyang iwali sa bersikulo 14. Mianhi siya aron sa pagmantala nga ang kahayag nagsugod na sa pagsidlak ngadto sa kangitngit alang sa katawhan sa Dios. Aduna nay paglaum, adunay mayhong balita, ug aduna nay kagawasan. Ang dili maihatag sa mga magtutudlo sa balaod, gidala ni Kristo sa iyang pag-anhi. Sila naghatag lamang ug interpretasyon sa balaod, apan si Kristo nagdala sa saad sa maayong balita ug.....kagawasan.

Si Kristo nagtudlo kanato ug samang mga butang ug sa samang paagi karon. Naghimo siya niini una sa tanan pinaagi sa iynag nahisulat nga Pulong. Atong mabasa ug matun-an ang Biblia ug madungog nato ang Pulong sa Dios nga magsulti kanato sa saas sa ebanghelyo sa gamhanan nga paagi. Ang mga Judio sa panahon ni Jesus walay mga Biblia sama kanato karon. Daghan kanila nagsag-ulo sa Kasulatan, apan dili sayon ang pagbaton niini sama kanato karon. Kita naay mga Biblia ug makabasa kita niini. Anaa kanato ang saad sa Dios nga ang iyang Pulong klaro ug masaligan. Anaa kanato ang iyang saad nga ang Epsirito magtultol kanato sa tanang kamatuoran. Gihimo niya kini pinaagi sa Pulong. Ug kini ang Pulong sa Dios, dili mga opinyon ug ideya sa mga tawo. Ug mao kini ang Pulong sa Dios nga nagtudlo kanato sa saad sa ebanghelyo nga naghatag ug kagawasan.

Si Kristo usab nagatudlo kanato karon pinaagi sa iyang Pulong samtang kini ginawali. Samtang kita nagalingkod ug naminaw matag Dominggo (ang adlaw sa atong kagawasan!), atong nadungog ang Pulong sa Dios nga gisangyaw ug gitudlo nga may gahom. Tingali naay mga gagmay nga bahin sa teksto nga ang ministro dili sigurado, apan dili kadudahan ang tibuok nga mensahe sa pulong sa Dios nga giwali. Bisan pa, atong giwali si Kristo. Ang mga pastor nagwali kang Kristo ug kaniya nga gilansang ug gihimo nila kini nga adunay kasigurohan. Kinahanglan nato modangop lamang sa gahom sa Pulong sa Dios. Busa pinaagi sa pagwali, ang gamhanan nga tingog ni Kristo madunggan gihapon karon. Natingala ka ba ana? Ang Ikaduha nga Helvetico nga Pamahayag (Second Helvetic Confession), usa sa mga pamahayag sa Repormasyon, nag-ingon nga “Ang Pagwali sa Pulong sa Dios mao ang Pulong sa Dios (Preaching of the Word of God is the Word of God). Ang Roma 10:17 ua sa mga bersikulo nga nagsulti mahitungod sa pagwali ug nag-ingon nga ang mensahe madungog pinaagi “sa pulong ni Kristo.” “Pulong ni Krsito” – nagpasabot kini nga ang pulong mahitungod kang Kristo, apan nagpasabot usab nga ang pulong ni Kristo. Si Kristo hangtod karon nakigsulti pa nga may gahom diha sa pulpito. Siya gihapon nagdala ngadto sa katawhan sa Dios sa saad sa ebanghelyo nga naghatag ug kagawasan.

Moadto kita sa unahon sa atong teksto sa bersikulo 23. Sa makausa pa, kinahanglan tagaan nato ug pagtagad ang mga detalye. Ang Balaang Espirito nagsulti kanato dinhi nga adunay tawo didto sa ilang sinagoga. Mohunong kita dinhi. Unsa nga klase nga mga tawo ang imong Makita sa mga sinagoga? Walay lain kondili mga Judio. Kini nga tawo dili Gentil nga gikan sa dalan. Kini nga tawo tinuli sa 8 ka adlaw pa siya. Gipadako siya nga Judio. Sama kanato, membro siya sa kasabutan, anak sa Dios, nakadawat sa saad sa Dios nga gihatag kang Abraham, Isaac, Jacob. Sama kanato, kini nga tawo gisaaran ug kagawasan diha sa usa nga maoy modugmok sa ulo sa bitin.

Apan sa pagka-karon ang bitin naghawid pa niining tawhana. Giingnan kita nga kini siya gipuy'an sa dautang espirito. Ang anak sa Dios nahimong ulipon sa bitin. Siya nagsulti ug naghimo ug mga butang nga dili ginabuhat sa normal nga anak sa Dios. Siya ilalom sa kamot sa dautan. Pagkangilngig nga kahimtang ang iyang nahiaguman! Wala kita gisultihan kung unsa na kadaugayon nga ingon ani siya, ug dili na usab importante. Bisan kung usa lamang ka adlaw, ang mahiagom sa ingon niani nga kaulipnan sa dautan espirito mangilngig gayod.

Ang dautang espirito nagdumala sa baba niining tawhana ug gigamit kini sa pakigsulti kang Kristo. Kasagaran mga hubad sa Biblia wala na giapil ang unang pulong nga gisulti sa tawo. Kini daw pulong sa pagkakurat nga sa atong pinulungan, “Ha!” Ang demonyo daw wala malipay nga nakita si Hesus sa sinagoga sa Capernaum sa Adlawng Igpapahulay.

Misinggit siya, “Unsa imong tuyo kanamo, Hesus nga Nazaretnon? Mianhi ka ba aron paglaglag kanamo? Nakaila ako nga ikaw ang Balaang Sinugo sa Dios!” Ang unang pangutana nato mao kini: nganong nag-ingon man siya nga “kanamo”? Kini nagpasabot sa kagamhanan sa mga dautan. Ang mga demeonyo bahin sa dakong kasundalohan – nasayod kita nga si Satanas aduna usab mga anghel nga sumusunod niya. Ang demonyo dinhi nahadlok kang Hesus ug kung unsay dangatan niya ug sa iyang mga kauban tungod sa pagtudlo ni Hesus – dumdoma nga si Kristo nagdala ug maayong balita sa kagawasan! Ang demonyo nag-ingon nga nakaila siya kung kinsa ang iyang kaatbang – ang Balaang Sinugo sa Dios. Ang mga tawo nagtimbang-timbang pa kung kinsa siya, apan kini nga dautang espirito nasayod ug iya kining gisinggit. Nakahibalo siya nga si Hesus mao ang gisaad nga Mesiyas, ang sinugo nga maoy magdugmok sa ulo sa iyang agalon.

Ngano iya man kini gisulti? Pinaagi nga ang unang pag-ila kung kinsa si Kristo gikan sa usa ka demonyo, gihan-ay na daan kung unsa ang mahitabo sa unahan diin ang mga panulog sa mga Judio nag-akusar nga si Hesus kauban ni Satanas. Si Satanas buot nga ang mga tawo mutoo nga kini mao ang Mesiyas – ang tanan nahibalo nga si Satanas amahan sa mga bakak, busa dili kini siya mao ang Mesiyas. Mura ug gibali nga sikolohiya (reverse psychology). Busa samtang magbasa kita niini nga mga pulong, atong dumdomon nga si Satanas malibongon. Pinaagi sa paggamit sa demonyo sa pagproklama sa kamatuoran mahitungod kang Kristo, murag ug mapildi na hinuon si Kristo.

Apan, atong ibutang sa atong hunahuna ang gisulti ni Martin Luther: “Bisan ang yawa gipanag-iyahan sa Dios.” Si Satanas nagtuo nga siya nakabentaha na batok kang Hesus pinaagi sa pagsugo sa iyang demonyo sa pagproklama sa kamatuoran mahitungod kang Hesus. Apan bisan gani ang yawa gipanag-iyahan sa Dios. Buot ipasabot nga ang yawa naa sa kamot sa Dios ug ubos sa gahom sa Dios. Ang Dios maggamit bisan ang kamaro ni Satanas aron moabanti ang

iyang plano sa kagawasan sa mga binilanggo! Tungod ka yang himuon ni Kristo nga paglukat mahitabo lamang pinaagi sa pagsupak sa mga pangulo sa mga Judio. Kabahin sa pagpaubos kang Hesus, nga naghatod sa iyang kamatayon sa krus, mao ang estratehiya ni Satanas sa paggamit sa demonyo sa pagproklama nga si Hesus mao ang Mesiyas. Busa, makaingon kita nga ang Dios ang nagbutang sa ebanghelyo sa baba sa demonyo. Kana nga hunahuna maghatod kanato ug kahibulong ug pagsimba sa gamhanan nga Dios.

Ang demonyo wala na gitugutan sa pagsulti pa ug lain. Si Kristo nagbadlong kaniya ug gipahilom siya. Si Kristo dili na buot ug dugang pa nga testimony gikan sa demonyo. Wala lamang niya siya gipahilom, apan aduna pa siyay dakong gihimo aloang sa anak sa Dios nga gipuy-an sa demonyo. Gipahigawas niya siya. Gipalayas niya ang demonyo. Wala niya kini gihimo pinaagi sa seremonyas o ritwal, apan pinagi lamang sa iyang mga pulong: “Gula nianang tawhana!” Dumdoma pag-usab nga ang yawa gipanag-iyahan sa Dios. Kining demonyha walay mahimo gawas sa pagtuman. Busa migula siya gikan sa tawo. Ang tawo gipakurog ug adunay kusog nga syagit ug ang demonyo mikagiw.

Sa Adlaw sa Igpapahulay didto sa sinagoga sa Capernaum, ang anak sa kasabutan sa Dios gihimong gawasnon ni Hesus. Mga igsoon, simbaha ang imong Manluluwas! Siya adunay gahom sa pagsulti u gang yawa mutuman kaniya. Mianhi siya sa pagdala ug kagawasan ug kinabuhi ngadto kanila nga gikawatan niini, ni Satanas, sa kalibutan, o sa ilang makasasala nga unod. Siya ang Manluluwas.

Ang anak sa Dios nahimong binilanggo sa dautang espirito. Kana makapangutana kanato ug daghang mga pangutana mahitungod sa presensiya sa mga yawan-ong espirito ug demonyo karon, ug kung kaha ang mga anak sa Dios karon mahimo pa bang puy-an sa mga demonyo. Dinhi moingon ako nga wala akoy tubag niina. Tingali sa sunod nga mga adlaw makatubag ako, pero dili karon. Ang ako lamang mahiwali mao ang mga butang nga sigurado ako. Sigurado kita nga ang atong Manluluwas nagdugmok na gayod sa ulo sa bitin. Iya kanang gihimo didto sa krus. Sigurado kita sa atong magbasa sa Pinadayag 20. Gikan didto ug sa uban pang sulat, makasiguro kita nga si Satanas ginapos na sa Dios. Wala na siyay mahimo gawas sa itugot sa gahom sa Dios. Makasiguro kita nga ang gahom sa Dios iyang gihimo sa iyang gugma kanato. Makasiguro kita sa atong mabasa sa Roma 8:38, nga bisan ang mga anghel ug mga demonyo dili makapahimulag kanato gikan sa gugma sa Dios nga anaa kang Kristo Hesus nga atong Ginoo. Mao kana ang mga butang nga sigurado kita. Atong huptan ang mga butang nga sigurado kita. Ug labaw sa tanan, mohupot kita kang Kristo nga maoy nagpahigawas kanao.

Ang bersikulo 27 nagsulti kanato nga ang mga tawo natingala sa nahitabo. Natingala sila sa iyang pagtudlo ug sa iyang gibuhat sa yawa. Makaingon ka nga natingala sila sa iyang gitudlo sa yawa – nga iyang gitudloan ang yawa nga siya ilalom kaniya. Si Kristo mao ang adunay gahom. Kung siya mosulti ngadto sa mga dautang espirito, sila kinahanglan nga motuman gayod. Wala pa gayod sukad makakita ang mga tawo sa Israel ug magtutudlo nga sama kaniya! Dili angayan katingalahan nga nabanto siya pagdali sa tibuok Galilea.

Tan-awa nga ang ilang pagkatingala u gang iyang kabantog wala dayon moresulta sa pagtoo. Dili ka kinahanglan nga molantaw sa unahan pa sa kapitulo 2 aron imong masayran nga wala magdugay nagsugod ang pagkontra kang Kristo. Ang tawo nga giyawaaan klaro nga

gihuptan ni Satanas – ang daghang mga tawo usab ilalom sa gahom niya, bisan kung dili kaayo dayag. Si Satanas maghimo sa tanan niyang mabuhay aron sa pagguba sa nabuhay sa Manluluwas. Gamiton niya ang tanang pamaagi nga iyang nahibaloan, dayag o sekreto. Apan sa kaulahian, walay makapugong sa Dios ug sa iyang dinihogan.

Kini naghatag kanato ug paglaum karon ug sa umalabot. Tinuod nga ang plano sa Dios alang sa kagawasan sa iyang katawhan wala pa gayod natuman sa kinatibuk-an sa kasaysayan. Wala pa gani kini natuman nga kumpleto sa tagsa-tagsa kanato – siya nagdala pa kanimo paabante ug naghimo nga ang kagawasan nga imong nadawat gikan ni Kristo imong masinati sa adlaw-adlaw sa pagbalaan kanimo. Walay makapugong kaniya sa paghimo niini kanimo. Ang plano sa Dios sa pagluwas wala pa usab mahitabo sa kumpleto sa kinatibuk-an katawhan sa Dios. Siya nagdala pa niini paabante, ug nagdala pa ug daghan mga tawo ngadto sa kagawasan kang Kristo, nagdala ug daghan pang tawo gikan sa gingharian sa kangitngit ngadto sa kahayag. Walay makapugong kaniya sa paghimo niini alang sa iyang mga pinili. Ang atong teksto, ug ang tibuok Biblia testimonyo sa gahom sa Dios kaniadto. Ug ang iyang gahom kaniadto, kauban sa iyang walay pagkabalhin nga kinaiya ug sa iyang saad sa umalabot, maghatag kanato ug rason sa paglaum. Sa katapusan, sa katapusan sa panahon, atong madawat ang iyang gisaad. Madawat nato ang katapusan ug katuman sa Adlawng Igpapahulay, ang atong mahimayaon ug walay utlanan nga kagawasan gikan sa sala ug kamatayon – kining tanan nga mga kahibulongang panalangin nga naangkon ni Krsito alang kanato.

Ang atong teksto nagpakita kang Kristo nga atong manunubos atubangan sa atong mga mata! Ngano man? Aron nga atong itugyan ug isalig ang atong mga kaugalingon pagdugang ngadto kaniya. Aron nga kita magdayeg ug dugang kaniya ug magkinabuhi alang kaniya sa pagpasalamat ug gugma. Aron nga kita mainiton gna maghulat sa adlaw nga ang piniling Anak sa Dios magdaug sa katapusang gubat ug kita mahimo nang gawasnon hangtod sa kahangturan. Umari ka, Ginoong Hesus. AMEN